

鳳臺縣志卷之九

文苑

北齊趙用建州人河清時貢孝廉策以十事對不如例弗獲第歸而山居習靜與本空僧爲方外交建修興善寺勒石爲記明碑稱其文體高潔今已漫滅無存

唐趙楚卿澤州人父元可上柱國楚卿有文望寶歷中第進士官監察御史以直言稱子璟見人物

宋秦谷字洪川澤州人治平初進士與進士馬同同受學於程明道顯一時科第蔚起以文與字名者甚衆谷有

鳳臺縣志

卷之九

文苑

府城廟碑篆刻奇古殊絕

馬泰字履夫澤州人登熙寧時進士才學冠一時碑版記序多出其手撰天王堂記潔古有體書法亦蒼古可愛金吳芝字壽夫澤州人登明昌中進士家居不仕以詩酒自豪與刺史許安仁遊碧落峽石諸勝臨風對月吟咏甚夥後復與安仁子諫議古登鳳凰山遊福巖院題名於壁

母彥倫字俊卿登承安間進士博雅工詩與郡守詩安仁楊庭秀遊歷山水碧落峽石諸名勝多所唱酬



明趙繼孟嘉靖乙未進士工詩文居官以風雅相尚累仕
夔州府知府著懋鶴道人漫稿

司齊好學有志操湛深經術以經明行修舉未仕而卒
吳自省嘉靖甲子舉人幼沉静寡言笑刻志讀書知韓城
縣九月懸車居鄉手一卷矻矻窮年足跡不入城市月
日高之

孟階嘉靖辛卯舉人幼好學醇謹無華居官之暇手不釋
卷工詩能文著歷山漫稿仕終承天同知

鍾鏐字歛齋嘉靖乙酉科舉人才思英敏不喜作制舉業

鳳臺縣志

卷之九

文苑

二

日以詩賦陶情從兄鑑令武進時携鏐與錫并之江南
延給諫王石谷爲師相與講詩文源流磨礪浸灌而學
業大進鑑成進士鏐屢試不第遂無意進取銓次亦不
赴以著作終所著詩文多散佚

鍾厚景泰間歲貢任鞏昌經歷性廉謹以禮法自守工吟
詩時有佳句人以鮑參軍目之

陳三晉隆慶拔貢官熒澤教諭能立師道講禮學以程朱
爲宗力黜王陸之學一時推尊之

梁煥嘉靖年貢生著玉成稿武文周隆慶年貢官

臨潼知縣著大全質疑

魏大觀萬歷歲貢代州學正冲夷好學名士多出其門呂
大中丞重其爲人顏所居堂曰清正學者稱清正先生
林萃秀監生任河南扶溝訓導設帳談經徧安定湖州之
法謹考課親定甲乙士風丕變登科名者倍於前

孟聖教崇正庚午舉人才敏而學優工吟咏以詩名一時
登科後見世亂不求進取飲酒浩歌以終張養蒙志其
墓

國朝趙日輝字炳初康熙中拔貢有文名時號通才著孝

鳳臺縣志

卷之九

文苑

三

經集說語錄若干卷

趙嗣彥字仲瞻舉人官武邑知縣博洽負時望趙懿侯採
其詩入晉風選范彪西採其文入晉國垂棘里黨碑板
多出其手

陳元字長公順治己亥進士改庶吉士少受學於叔父昌
期渾深博雅古文卓然成家與弟大學士廷敬迭爲師
友後廷敬以文章名海內皆元教之也元告假歸里卒
所著詩文甚夥今多散佚不傳

張肇昌字樵嵐以例貢官泰安州倅州推河間府通判才敏

學富工爲詩政事多暇登臨皆成文章所著有定堂稿
集董默菴訥歸惺崖元肅爲作序弟肇暲字旅門雲南
趙州知州亦有詩名與韓慕廬蔡徐健菴乾學友著古
天洞叢桂莊諸稿

董致順治丁亥進士常德府推官工詩能文陳廷翰康熙
甲午舉人穎敏善書陳廷弼湖廣桂陽知州陞員外郎
著清田錄趙求益舉人叅議九思子工詩趙懿採入晉
風選

苗大素字含章乾隆辛酉舉人父喬年字鳧來讀書工詩

鳳臺縣志

卷之九

文苑

四

文內行醇備生平無疾言遽色足不出戶外望重里黨
以謚生貢入成均雍正六年舉賢良方正辭不就石大
中丞高其行命郡守劉毓昂表門閭選授沁源訓導未
仕卒大素勵品行績學能文少年補諸生乾隆間山右
以制舉業著者爲孟縣王編修瓊陽城田侍御嘉穀適
罷官家居嗜古爲後學倡一時詩古文翕然稱盛大素
以諸生從兩君遊稱國士初有巨室慕其才欲壻之父
辭以旣聘而巨室意甚殷願納女爲側室大素裁以義
事乃寢爲文冥心獨往至誤入人家婦女驚怪若不聞

也每試輒冠曹偶提學彭廷訓沈文鏞方伯許溶等號
知文屬郡守朱樟周其乏樟雅識大素清操乘間示意
果辭不納辛酉省試文爲房考所乙主司阮學浩搜遺
卷得其文再三稱贊至察吏一策擊節曰晁賈無以過
也遂獲售屢試春官不遇遂無意進取教授鄉里以終
所著詩集若干卷留門人李仲升家李天死遂失傳子
令琮乾隆辛卯舉人

馮繩祖字念菴幼負異才讀書能文時河南殷元福以制
藝稱與爲莫逆交受業聞喜張克嶷通周易奧旨理學

鳳臺縣志

卷之九

文苑

五

師復齋莊亨陽以程朱爲宗選貢入太學大司成楊名
時大爲賞識名重一時徐令民鐸提學山左延入幕拔
取名宿如金鄉劉苞麗鉅野傅爾德定陶劉可考新城
伊桂等癸酉登科名者四十餘人多成進士號爲知人
晚年艱於遇落魄詩酒流寓歷下而卒所著詩古文及
辨真吟藏於家

衛芳字含華少爲諸生以等高行優貢成均士林推重教
授鄉里楊簡人仙枝朱西侯三英皆出其門卒之日貧
無以殮陶太守自悅稱其和不傷介廉不戾俗當於古

人中求之

孝義

北魏蔡祐事親孝屋側產芝草人以為孝感所致官
所有祿俸盡給族之貧乏者及卒家無餘貲人皆義之
唐孟聞澤州人咸通中官禮部曹郎澤境峽石山舊無勅
額聞為奏請於朝勅賜青蓮寺為額雖事涉佞佛而禮
秩名山亦義行之一端也

郭存實澤州人晉稱天祐時官太原招信軍都虞侯晉累
分爭存實身在行間累立戰功嘗遊峽石山於羅漢樓

鳳臺縣志

卷之九

文苑

六

前立石幢為記云惟願烽烟早息四民樂業以武臣而
存是心其軫念民瘼任郵鄉里有足多者

後周郭思俊澤州人晉漢以來累立軍功廣順初官柱國
尚書開國郡公致仕家居與同里父老結社事勸修祠
廟敦睦戚族恂恂如不及觀者不知為貴公卿也據石
經幢叙其官闕甚悉而名不見於史今其地猶號郭莊
蓋為其故里云

元司計字成憲官戶部郎曹至正末天下兵亂去官歸家
故豐於財多義行出貲勸修文昌祠以崇文教參議張

衍記其事於石

和居中性敏博學篤於交遊潛德弗耀以高年者碩旌表其門

明王仲達洪武二年舉孝廉令中江秩滿乞歸終養永樂間徵取堅志乞養如初贈勅獎諭給鈔錠以歸

景寧族指千餘五世同居洪武初旌門

明萬歷丙戌丁亥間大稔好義捐助設粥煮藥者顧州誌載有知州鄭際明高平知縣許安遇陽城知縣王雅量各捐俸煮賑藩封捐祿有充琰等十六人搢紳捐米者

鳳臺縣志

卷之九

孝義

七

周盤等十五人生監助賑者有董三策等十三人修藥督施助米助銀民有馬世俱張垂芳等十七人又有庠生任敦化捐地四十畝供天井關聖廟春秋祀享庠生郭鎮邦捐施義塚一所

苗杰字謙齋煥之父生而淳篤不好弄弱冠入庠食餼試輒冠軍郡推德行之士以風厲矜帶率以杰爲首生平尚義重然諾有內戚孤嫠在室旁有豪欲奪其產當事者受其賂產且立破杰忿然面直之當事某啣甚會學僂者按澤中夜搆蜚語中傷甫漏下五鼓無疾而卒翌

日同官於袖中得其草則相顧詫異謂杰之有天也屢試秋闈不獲售值子煥登第嘆曰有子如此奚必自我貴哉遂辭餼或有言少需歲可里選則笑曰吾業以貴須子乃不須一第而須一貢耶遂優游里居於名利之場泊如也以子煥貴贈如其官學者稱謙齋先生

張祿張祐張智兄弟孝友母任氏歿共廬於墓次楊貞肅繼宗有詩美之見碑刻

朱仕樓鎮國將軍幼失怙母遭疾籲天請代既葬坐卧一小軒終制不御酒肉不入內正德間旌門

鳳臺縣志

卷之九

孝義

八

朱成錕隰川王諸孫父仕塙坐罪幽鳳陽成錕微服走鳳陽視喪上疏自劾越禁乞負父骨歸葬澤州卽不得願爲庶人止墓側歲時省視詔許之乃奉喪歸第成錕亦好學有志概嘉靖十三年上言雲中叛卒之變幸獲消弭究其釁端實貪酷官吏激成之臣慮天下之禍隱於民心異日不獨雲中而已指陳切直帝下廷臣飭行時以兄弟稱二難焉

朱成錢輔國將軍事父母問寢侍膳極誠親歿先後廬墓六年嘉靖間旌門

朱成鎮輔國將軍仁厚以孝謹著力學攻苦獨究性天之旨著太文錄二冊進上賜救獎之

朱聰涑奉國將軍性好儒學與弟聰澱聰澁居同學同友恭同嘉靖旌其堂曰孝義

石文奎自高祖玉歷五世同居一門敦睦食指幾千數無異意嘉靖間表閭

孟瀚自祖至姪寬四世同居無私財無諍語人稱義門

朱俊棟鎮國中尉母趙病危一禱而愈母壽九十孝養殊篤推擇宗正有清節妻段氏早逝不更娶卹庶兄俊蔭

鳳臺縣志

卷之九

孝義

九

遺孤婺甚至捐田贍宗學出粟千石賑郡饑萬歷間下詔褒之歿賜祭葬長子充倓博古善書有內行設義田以給貧宗其仲曰充倓少慧力學善事父母兄弟五人同居不私一物父有異母兄弟三人孤而寡力佐卹之其季曰充醬繼父爲宗正萬歷中捐米八百石救荒得卞嘉獎

朱允燿輔國中尉宗約俊傑子孝友雅飭以厚產讓弟賑粟濟貧焚千金之券三十載中瘞骼至千餘具教子維翰八庠宗室中在澤者嚮學好義稱賢王孫云

朱廷埭字憲明奉國中尉隰川王裔明制願仕者以本降
易之遂膺貢知臨寶縣闖逆臨城多殺傷益衆攻圍城
陷廷埭死之一門俱殉時崇正十五年

朱運昌字敦素宗裔爲貢士判鞏昌崇正十六年城破廷
降不屈賊支解之

裴爵椿子舉人授豐縣令聞父訃星夜奔喪表墓立祠晨
夕哭奠服除補臨漳令迎養母於署母後歿哭奠如父
禮再任吳橋乞歸置祭田建社學修家規里人稱厚德
焉

鳳臺縣志

卷之九

孝義

十

侯勲大司馬璉五世孫錦衣僉事夔子父疾温衾嘗藥朝
夕同卧起及歿哀絕者數四廬墓哭奠感羣鳥悲鳴樹
上讓爵與弟不襲時稱孝友事闈旌門曰思親讓爵

馬宗盛幼孤事母至孝母亡勺水不入口哀毀幾絕旣葬
廬墓斬衰泣血三年不櫛沐髮成羶盡脫人哀之時有
白猿慈烏之異事聞旌表

趙友益郡廩生父九思抱疾日待湯藥衣不解帶者月餘
病篤禱以身代卜玆得鼎折足語曰吾父三昆弟凶讖
也再禱得問壽九十九語比得疾悟云予兄弟亦三人

應在我乎誓不藥遺命妻孥兄弟可善事父母吾亡矣
遂於九月九日歿父疾尋果愈

袁維新郡廩生父疝痰危甚日夜籲天祈以身代及父歿
事母終身色養昆弟終身無間言旌曰首篤天倫

張希魯少服賈於外母病疽忽心動而歸親侍醫藥獲愈
長兄亡姪變復早歿婦斬方有娠魯旦夕籲天祈生男
衍兄嗣及產果男名曰培德百方撫愛斬感之守節益
堅季兄無子遺一女盡舉其遺財嫁之仲兄析箸蕩其
家乏生計屢贈累千金親隣待以舉火者無算更輸粟

鳳臺縣志

卷之九

孝義

十一

千石賑荒萬歷初詔建坊有從兄希曾亦同心蠲賑時
並旌焉

秦一清庠生事大父盡孝時有家難準情調劑遭母喪哀
毀逾禮朔望率弟拜墓終其身奉父色養事繼母得歡
心甘貧力學律已甚嚴絕無惰容竭力爲季弟謀婚娶
不以異母有差等

段廷徽萬歷時拔貢鴻臚署丞建安慶寨以防盜

李廷玉父母有疾藥弗愈日夜稽顙北辰復剖股和羹以
進病霍然起親歿治喪不用浮屠會與鄉飲介賓年七

十以疾終

李用年十五補博士弟子員成化丙午舉於鄉越三載丁母憂哀毀踰禮廬墓三年宏治壬戌知陝西醴泉縣事尋陞慶陽府通判致仕卒年七十有三

王昇字貿易京師北都陷自縊死見聞喜翟鳳翥王義民附傳

楊世英字孟紹名諸生也會盡推先世產業於其仲秀博母氏歡退而食貧甘之如薺郡守重其高義贈百金却不受才氣磊落爲學使袁繼咸所器癸酉同學王采趙

鳳臺縣志

卷之九

孝義

十三

嗣美計借北上送以詩曰謬得與君三屈指公然先我兩伸眉兀傲自若殊不屑屑然或諷以順時榮譽曰大丈夫寧爲金玦毋爲瓦合其標致如此

國朝衛正心字翼中任俠好義重然諾所與遊多賢豪長者國初授陝西中軍守備未幾歸築室太行山之六箕村引泉鑿石以爲園不復仕進設義塾及文華書院入腴田給生徒膏火建置砦堡橋梁平治道塗祠宇在祀典者剏而新之每歲暮設廩鑑以濟貧困鄉里感德於其歿爲立祠以祀孫樞次楷以厚德世守其家

宋英字木若舉人任榆次教諭修學校士有聲壇坫鄉居
時叛兵任國竒來攻本鎮清寧堡英率弟華協力捍禦
殲渠魁圍遂解全活者男女計二千餘人里人感之
張恕正京子舉人任曲沃教諭有才名父歿長號嘔血築
室墓次日震亭廬每上食如生時哀感道路自作記并
十慕詠見志學使臨郡諸生上其事得嘉獎當日試題
有徐庶何如人論蓋爲恕正也

宋盛宋興德兩人從兄弟也辛未蝗蝻災各蠲千金市粟
救賑民得不流亡以死尋復完治湯王泰山兩廟工爲

鳳臺縣志

卷之九

孝義

十三

禱雨以救旱乾鄉人咸義之

張應嵩康熙己酉舉人性篤孝友恂恂父兄間跬步不忘
賈志早歿

衛樞光祿典簿任江南和州知州居官以善政聞其治家
更有法度仁而好施鄉黨多被其周卹

張烈康熙庚戌進士中書舍人清約有守施田以築水口
張廷布衣尙義其讓弟產訓子姪及焚券給粟諸行誼積
久人尙能道之同時又有王濟中者以冒賊刃捍病母
爲鄉里所稱

王璇字在只自振子諸生入貢以鹽筴經營歲往來燕趙間慷慨周難亦如其父康熙辛未蝗爲災璇輸錢數十萬令捕瘞之歲饑佐賑人賴以生太行古稱隘道商旅苦崎嶇宋運使陳堯佐劄奏修築歷數百年雨冲石斷人畜往來率不于以行璇傾貲修築成坦途百二十里郡守佟國瓏爲立碑以記子廷揚傳載人物

蘇榮生處士以友著治產與弟天澤共日用婚嫁纖微無私五十年如一日族伯母寡而無子生養死葬咸於二子是賴榮生精醫所活甚衆有所著病鏡一書子廩生

鳳臺縣志

卷之九

孝義

古

挺起與其胞姪庠生貞起一遵家訓亦不分財異居

衛楷字魯林康熙己卯副榜性孝友居鄉多義行康熙辛丑山陝大饑流民徧野楷蠲金三千兩佐賑卹由州解送平陽散給之雍正癸卯歲大祲米價騰湧民多乏食楷於河南糴運穀麥發本地減價以平糶自四月至七月往返接濟賴以全活者無算其他嫻睦任卹類多古風

陳廷繼性至孝念諸兄弟俱服官中外力請家居日侍父光祿膝下先意承志務得歡心及父歿任國子監學錄

以培育人材爲己任一生謙謹公正鄉閭愛重康熙甲戌冬十二月請於朝崇祀鄉賢

劉孝勗字子桓居河東村性孝友父卒於山東歷城之漯口鎮千里奔喪一人獨任不以諉諸弟兄居喪盡禮哀毀骨立同懷五人析箸時以已得分產悉以讓兄之遺孤常有人投以贖金者則棄諸河曰我寧受人欺不可以此金欺人也時以利濟爲懷宗黨咸蒙其德舉步必詳視恐傷蟲蟻非燕享不殺牲時稱寬仁長者子世振承孝友遺緒族不能自存者悉賙卹之立宗祠置祭產

鳳臺縣志

卷之九

孝義

十五

敦本務行山右州郡早歉捐穀助賑居傍餘屋設義學延師淑里中兒孫滋善登雍正壬子賢書

王宏烈舉人用賓孫父歿依母且二十年母忽思改適泣諫語甚痛知勢不可挽觸首伏地慟竟投緘園樹死
孔興晉文明子父歿廬墓二年又有同邑張所蘊字冀山亦以廬墓稱孝

焦逢原歲貢生屢舉鄉飲爲人厚重謙和親老家貧恒資館穀以娛親意事伯兄甚友愛兄歿視兄子如己子殫心鞠育期於有成晚歲曾元林立五世一堂年九十以

壽終又有張能敏以孝友稱亦於雍正五年舉鄉飲正
賓

常乃綱康熙甲午舉人雍正丁未知湖南永興縣事閱四
月以病歸終身常持忍字爲鄉人所敬愛四世同居恬
靜寡欲一時服其高義

張廷諫母早亡育於繼母依依膝下不異所生先是父存
日家故貧及父歿益困乏廷諫樵採山中或中田力作
稍得微資竭蹶以供老母如是者五十年廷諫貿易曰
方家業饒裕事母愈恭謹遇一幼弟無私財時以孝友

鳳臺縣志

卷之九

孝義

六

稱

李永祺性至孝父重華年老多疾永祺日夜在側飲食湯
藥必親嘗食上則視寒煖之節如是者三十年

李永禧少時遠服賈一錢尺帛不入私房兄弟四人同居
共爨終身不分析公舉鄉飲僎賓壽八十四

秦彬爲陰陽正術撫弟遺孤俾成立葬族中久淹之匱敦
本樂善年登大耄亦編氓之好修者

李重華嘗於道左拾得白金千兩徧訪原主還其金屢舉
鄉飲僎賓壽百歲

王封沂字又正邑廩生性至孝友愛兩弟終身無間言與人交久而益篤邑孝廉苗大素張怡茗與同文會三十年始終如一每試輒冠軍未幾貢而卒後其子熙載登第大素語怡茗曰此又正孝友之報也其為友朋推重如此

孔興鈞字協中康熙乙酉武舉鄉試第一為人坦直有才幹任事無所私嘗與修郡志使人廣為採訪助成其書王鏐字涵紫父廷揚官工部左侍郎別有傳鏐雍正己酉科

鳳臺縣志

卷之九

孝義

十七

欽賜舉人丁內外艱服闋授刑部山東司員外郎尋以生母年老乞養終制補廣西司擢湖廣司郎中加光祿少鄉銜任西曹晨起視事夜燭治讞詞平反庶獄時稱明允退事餘暇獨居一室披覽圖史兼工繪事與戚友詩酒陶情未幾以疾卒官大學士孫懿齋嘉淦志其墓鏐天性友愛與兄鏗同官京邸出入必偕居鄉多善行境內歲歉出粟平價以糶鄰村西峪被水為死者掩骼於生者煮粥給食親友有逋負代償至數千金其他助友卹鄰好義樂施不可殫述蓋王氏家世積善鏐能存

其遺風云

李華然性好義遇饑歲常煮粥施賑貧民藉以存活初本里武勝坊八甲每苦差徭里人往往逃匿華然代諸貧戶完納郡縣主稱曰義民

成允升庠生事父先意承志克盡子道父疾親嘗湯藥父歿葬事甫畢哀毀成疾而卒里人哀之

秦自福字秀之鄉居以孝聞遭父喪築室墓旁廬墓三年前州守倫可大表其門曰白雲之廬晚年流連山水時形於畫亦瀟洒有致年八十以壽終

鳳臺縣志

卷之九

孝義

六

原一誠字百源自曾祖以來六世同居父天祐早逝一誠生甫五月叔天相視同己子教之成人天相卒悲痛如喪父服斬衰三年報之越十餘年母亦亡一誠哀毀骨立葬後營土室居於墓朝夕泣拜上食如生時三年服除戚里勸以歸不從家人均痛哭往省之乃約與俱歸事聞於縣知縣陳詩表其門曰孺慕性成

楊兆熊字瑞男邑庠生生七月而孤嫡與生母共撫養之稍長卽有至性與人語及其父輒泣涕不能食事兩母備極色養兩母先後歿哀毀骨立三年不御內終身素

服齋蔬絕讌會鄉人稱孝子德輿亦以孝稱

彭克已邑庠生父年老喪偶多病克已朝夕侍側床褥衣履以及日用飲食皆親爲料理幼子年十一二亦能侍其祖祝哽噎委曲周至蓋克已之孝有以喻之也初克已未生時母爲父置一妾父曰吾弟尙乏妻我何可有二妻以爲弟正室次年卽生克已人謂其世多孝友云張爽字西伯捐守備職父歿事母以孝白首如一日母歿痛哭出血以哀毀卒前令沈榮昌匾其門曰孝踰萊子張鈞幼有至性事親以孝迨親歿水漿不入口者三日喪

鳳臺縣志

卷之九 孝義

九

具悉遵文公家禮自小祥以及大祥不御肉不聞樂不飲酒不如葷蓋發於誠心非有所強也前縣沈榮昌表其間曰純孝全貞

劉豪家貧無妻以手藝爲活事繼母盡其孝日所得錢必備甘旨以奉而自或忍饑餓不令母知也母病卧床褥豪日夜侍湯藥數月不懈母病漸愈後值母歿哀毀骨立每逢令節哭奠墓下數年如一日未幾而卒

李庚長溫湘藻李東旭范崇雅段鏢范維睿李王唐鄉人皆以孝義稱

隱逸

北魏陸旭性雅淡好易緯候之學撰五星要訣及兩儀真圖頗得其指要太和中徵拜中書博士稍遷散騎常侍知天下將亂遂隱於太行山屢徵不起卒後贈并汾恒肆四州刺史

唐趙令岳澤州人散騎常侍元方之子博極羣書文學爲一時冠雅志林泉德望茂著戒子孫曰五常不可失也時修史有以學術薦者避不就

元白處善澤州人性警敏有學行嘉遯不仕世祖高其志敕曰身都道義淡然無名利之心家富詩書樂矣有田園之趣賜號義安處士祀鄉賢

趙宗元澤州鄉貢工文詞山居高蹈一時學者多稱之號沙城野隱

韞嗣宗號丹川隱士府志云行事不概見於其時亦避跡邱園者

明張席珍字雲生先世自鉅野徙澤州父應禮以菽粟權子母歲大祲珍童時卽竊焚其券弱冠遊學宮性恬淡不希華膺寡交遊定省婚嫁外了不縈心服食日用率

儉朴有司博士之門足跡不至遭母喪哀毀病卒苗大中丞胙土以隱君子稱之

王遜之明初逸人相傳有詩云勞身苦苦逐浮名身與浮名孰重輕身勞名得猶爲可無奈身勞名不成亦見高致

王隆孝友謹信安貧好學無意仕進長於勸善鄉邑傾慕有王彥方之風年八十餘攜冊諷詠嘗題希夷高卧圖以自况其詩曰汴京龍虎風雲會華岳壺蘆日月長非是先生真愛睡達人羞看利名忙

鳳臺縣志

卷之九

隱逸

二

國朝蘓寰字生生博覽羣書喜吟詩囊蓄禁方醫人多奇驗會召不赴去而遁跡杜門高卧郡守王璋以母疾屈之不應強以往不冠不揖家人危之寰坦然不以爲意璋愈加敬禮母病尋愈其疏傲多似此所著箋易出已意不規規先儒成說詩有達情佶屈難讀究心六書訂正韻法直圖藏於家

僑徒

唐陳子昂字伯玉梓州射洪人文明初舉進士擢右拾遺少未知書以富家子尙氣決戈博自如他日入鄉校感

信痛自修飭初爲感遇詩三十八章王適見之曰是必
爲海內文宗嘗寓澤州登北城樓題詩其上載藝文

李華字遐叔趙郡人開元進士第天寶時爲監察御史善
屬文蕭穎士多推獎之華疑其誣辭乃爲祭古戰場文
燠汙之如故物置於佛書之閣與穎士因閱佛書見其
文華謂之曰當代秉筆者誰及於此穎士曰君稍精思
便可及此華愕然後安祿山反授僞命被收貶官放廢
嘗薄游澤州石佛閣題詩於壁卽彌勒寺也詩載藝文
崔信明青州益都人博聞強記下筆成章大業中令堯城

鳳臺縣志

卷之九

僑徒

三

寶建德招之不屈去隱太行山貞觀中應詔舉終秦川
令

荆浩沁水人自號硤谷子畫史以荆關董巨稱畫家正宗
硤谷爲澤寶巖寺山浩嘗流寓其地以作畫或因自號
云

宋宋敏求字次道趙州平棘人參政綬之子郡守選之從
子也選爲澤守敏求隨之署澤人劉義叟以唐彌勒寺
篆刻弗能通曉攜楮本之京師因宋子京始盡識其義
貽校本於選選命敏求以隸書作碑文刻於郡廨史稱

敏求進士及第家藏書二萬卷畧觀卽能成誦熟於歷代典故士大夫有疑義必就而正之累仕至龍圖學士金許古字道真河間人郡刺史安仁子安仁以明昌五年守郡古卽以是年登詞賦進士第至承安五年來遊青蓮寺題名石壁正其父節度汾陽時也同時張天祐君玉吳壽夫芝僧寶寂皆其父安仁舊與遊者書法絕佳史稱其好爲詩與字而不爲士大夫所重但稱其直云吳鼐字英菽洛陽人嘗於天慶觀訪潛叟喬道人可度留題七言古詩於寒碧軒其門人侯卽跋其後云陳瑩中

鳳臺縣志

卷之九

僑徙

三

有言愛其人敬其字是以東坡美之先生歿已十五年潛叟出此詩覽之句法豪爽筆力蒼遒灑然有古人風恐他年散落命工摹勒上石以示愛敬之意焉

喬叟初名逢辰字仲章或作君章洪洞人天德二年進士自號蓮峯真逸大定戊戌由山陽歸天黨遊青蓮精舍約晉城安霖巖起張瑾孔璋携秋泉如林下約雅集釋道宴寂日照行軒題名石壁期而不至者則孫明遠昶也

趙秉文字周臣一字開閒磁州滏陽人幼穎悟讀書苦夙

習登大定時進士明昌間入爲應奉翰林文字兼知制誥坐上書攀王庭筠等久廢河北兵亂常僑寄澤州之涇谷寶巖卽淨影寺也嘗遊開元寺詩貞祐初再轉翰林兼學士密國公完顏璫詩有聞趙閒閒再起爲翰林律句云寶巖涇谷西窻夢不信秋來不上心按涇谷寶巖淨影寺名也秉文嘗流寓茲土於此詩見之

元好問字裕之太原秀容人好問七歲能詩年十有四隨叔父陵川令泰於官從郝晉卿學嘗僑居澤州涇谷僧舍不事舉業淹貫經傳百家六年而業成下太行渡大

鳳臺縣志

卷之九

僑徙

二四

河爲箕山琴臺詩禮部趙秉文見之以爲近代無此作也歷官尙書省左司員外卽金亡不仕以著述終

元張衍河東人官中書行省至正末天下大亂去官歸僑寓於澤嘗作文昌行祠書文俱佳元亡不知所終

和希文太原人呂忠肅之高弟也元末不就祿養母太行中飲水著書以爲樂值兵荒相仍暴軍掠人以充食所向殆盡希文保障獲完弟孤女十有六人艱難中咸抱保携持卒歸士族明初徐魏公達薦擢贊善行以母老辭歸

明董其昌字元宰華亭人萬曆十七年進士善書畫自成一家由翰林官湖廣學政謝事歸與州人張方伯光緒爲同年友嘗北遊太行累年主其家熹宗初起爲侍讀學士修神宗實錄命往南方採緝先朝章疏遺事迂道過澤寓居月餘乃去所作書畫甚夥收藏家得其片語隻字奉爲拱璧嘗有人集其在澤啟札數十裝爲手頁余曾一見之皆其昌真蹟云

吳開先歙人勇畧知兵機善戰崇正五年流寇躡山西監司王肇生便宜署開先爲將使擊賊戰澤州城西賊敗去從沁水轉掠陽城開先恃勇渡沁戰北留墩下擊斬數百人砲盡無援一軍盡沒事聞贈游擊將軍

國朝姚恭海豐進士順治初仕冀南道會姜瓖叛其將張斗光陷澤迫恭降不從死之子孫遂家於此 按明史遼陽松山之破被執死者有兵備道姚恭名或係另爲一人不可考

梁保素自號保素山人冀州人流寓高都五十年能鼓琴圍碁爲一時國手善清談娓娓動聽年八十餘殊矍鑠無室無子四壁蕭然而徜徉春容黃冠羽衣有太虛真

人之致一日遊析城不遠張別駕肇昌以詩悼之
蔣堅字磨之江西鉛山人候補州同以名法佐郡守佟國
瓏幕十年始終其任會民多逋欠逮國瓏下獄堅單騎
馳至澤伴國瓏獄中數月澤士大夫皆願輸刀布脫國
瓏於難後州牧劉毓岳扼之一日訟庭杖一囚忽大呼
曰吾事如在蔣公時寃雪久矣毓岳問案吏具以對乃
躬詣獄中延堅出欲賓之堅曰我爲佟公來不知有公
劉曰主我必脫佟公堅曰脫佟公無不可劉下令曰能
爲佟公輸金者聽三日集五千金國瓏歸而堅佐毓岳

又三年劉以憂去方欲歸郡人王少司農高其義延爲
上賓歷佐其子弟慕堅在澤時生子士銓十餘歲歸里
今官翰林院編修

古葵陝西華州人雍正間以形家言遊澤實未見其爲人
相地善行草書法酒後輒筆墨淋漓流傳人世蠡縣李
剛主恕谷後集中稱其紹李二曲先生之學云

郝敬堂字雄峰長治武舉有偉畧能爲詩與字兼善輿家
言溥遊高都爲諸大姓卜墓田延請無虛日鄰村會飲
抵暮醉而歸見道旁遺金數百仆其上至三更餘待夫

者至與之亦不告以姓氏。得狂疾越三年而愈。遂
鳥獸語後復來遊館於尹孝廉家。嘗指鳥獸聲譯爲人
言皆不之信。一日犬自外吠入。苗孝廉令琮竊問之。起
曰：尹中表某乘黑驟單騎至門者之款候人。犬吠蓋此
言也。驗之果然。乃知公治長之通鳥語。隆多羅之識豕
言不足怪也。高平司明經昌齡重其人爲作傳。以上僑寓
明孟兆祥字肖形澤州人。徙交河。天啟壬戌進士官大理
評事。歷吏曹。至刑部右侍郎。以劾魏忠賢削籍。崇正初
起太常寺卿。晉刑部右侍郎。闖賊犯都城。啣命守正陽

鳳臺縣志

卷之九

僑徙

二七

門賊至。冒白刃死。門下妻何氏聞之立死。子章明字伯
昭癸未進士。甫觀政。難作殮。父骸訖。亟歸訣其妻王氏
曰：吾往從大人。不忍大人獨死也。王曰：爾死吾亦死。章
明俯首至地曰：謝夫人死。夫人盍先死。盡揮僮奴出。留
一婢侍視。王投繯。提筆作詩。已復淋漓書壁。有傷。其天
婦屍者必爲厲鬼。殺之王絕。置扉上加命服。又舉一扉
列王左。呼婢曰：吾死置其上。遂衣命服。縊而死。南渡贈

卹

本朝褒忠與范吳橋等同予祠。給地錫謚兆祥。忠靖章明

貞孝

茹夔茹言雲南籍其先澤州人七世祖太素編置子孫於
滇遂家焉夔言兄弟同登嘉靖壬午科舉人言子嘉癸
卯鄉舉官工部郎中

國朝衛璪字文漪澤州人徙滄州祖正身字肖菴 國初
大臣安撫至滄率衆歸附康熙初兵備周卜世南征吳
逆於歸德軍次助餉數千金卒贈光祿大夫父其傑字
卓萬輕財好義康熙己巳歲大祲捐萬金爲賑濟計鄰
邑咸集爲設米粥綿衣以待巡撫于成龍聞於

鳳臺縣志

卷之九

僑徙

三

朝授光祿大夫事載天津府志璪少有譽望以鄉貢充滿
洲教習授富順令邑自獻賊蹂躪戶口蕭條璪招集流
亡使歸業城郭廨宇以及橋梁道路出私財修葺之不
以累民兵亂後人不知學爲建書院訓課生徒士風丕
變俗故健訟以誠相格民漸化擢台州同知會

朝廷命穆旦金世榮會勦玉環山寇玉環孤峙海中卒難
率服璪身入其巢招而降之上官嘉其能委以疑難諸
案立爲剖決嘉興等三邑舊有田相錯壤爭訟無寧歲
璪三分之爭訟永息吏治爲兩浙最擢延建邵道卒

衛璠字孫魯璠之弟甫冠成進士授華亭令華爲江左財賦劇邑積頑成習璠至催撫並行民樂輸將風俗丕振擢刑部主事奉

旨纂修律例書成陞禮部郎中轉陝西神木道神木五里外卽屬外境邊民耕種樵牧相錯雜馭之稍不善輒易生釁璠開誠布公宣示

朝廷德意人民安堵

誥授光祿大夫卒於官工詩文所著有老莊旁註經義集要等書事載天津府志

鳳臺縣志

卷之九

僑徙

二九

衛瑛字修五璠季弟由拔貢授都察院經歷擢刑部員外郎轉臨洮道以仁恕爲治建義學以造諸生其貧者記其姓氏居址陰資給之凡二百餘人事載天津府志有傳

王璽字瑞圖澤州人流寓江南有肝膽識力以豪俠稱舊佐李孝源南贛幕府鼎革後僑寓蕪湖入

國朝苗胙土起爲南贛巡撫安陽張鏡心薦之軍前稱其熟知江右情形緩急機會可得虔中消息大足倚仗會胙士卒不知其所終

以上遷徙

方技

宋呂道人失其名善爲沉泥硯多作投壺樣其首有呂字非刻非畫堅緻可以試金道人死硯漸難得蘇東坡於元豐五年至沙湖黃氏家見一枚黃氏不知貴取而有之

蕭照頗知書亦善畫流入太行山爲盜一日掠至李唐檢其行囊不過粉奩畫筆而已叩知其姓名照雅聞唐名卽辭賊隨唐南渡得以親炙唐感其生全之恩盡以所能授之紹興中補廸功卽畫院待詔賜金帶其畫山水

鳳臺縣志

卷之九

方技

三

人物異松怪石蒼浪古野惜用墨太多書名於竹石間見圖繪寶鑑

金姚擬字士言鄉貢進士明悟有巧思工畫山水嘗從刺史許安仁書碧落寺碑是日隆冬風寒山堂壁間有烟塵跡自成山水圖非人工所及擬燃薪炙手走筆仿之頃刻而成迥出畫家畦町之外時以爲神品云

張天祐字君玉明昌中詞賦進士工吟咏尤長於音律絲竹管絃之技各擅其長嘗從郡守許安仁遊峽石青蓮寺涉丹水南回顧殿閣在青巖間天祐鼓琴僧洪源和

之曲盡音節之妙聽者如聞高山流水悠然有世外想
元姚昇字子昂金末鄉貢與李莊靖俊民爲友工詩善畫
馬世傳畫馬圖而款書子昂二字者皆昇筆非趙松雪
也俊民嘗謂其似曹將軍篆隸亦推重一時俊民碑版
多其丹書云

郭顯道以醫名一時李鶴鳴兩以詩贈之

明程應寵太醫院吏目少聰穎善岐黃術切脉決生死輒
中有奇疾莫名其症者一藥立起生平以活人爲心病
者貧富弗之問卽窶丐亦代爲療治有手錄醫案等書

鳳臺縣志

卷之九

方技

三

國朝趙嗣美字伯瞻順治丙戌進士歷官福建僉事有文
名工畫山水隨筆揮洒皆胸中邱壑有自然之趣見圖

繪寶鑑

衛永耀字徑千性慧巧善音律工書畫凡醫卜占候形家
言以及擊劍拳勇篆印雕鏤刺繡女工食譜酒經無不
通曉詩亦有佳句著石坪印譜得樹樓詩稿

袁爾梅坦率無文嘗於道旁拾遺金追還其主人重其義
生平精六壬術占驗多奇中其賣卜日以三課爲度備
一日所用不復爲人卜雖強之弗告也某紳爲縣令所

謹被逮赴省會禍且不測爾梅爲成一兆曰天赦星照
命宮不出十里罪可解行至七嶺店遇赦獲免時以爲
天罡復生然性過顛且好與人爭訟論者亦以是少之
釋老

漢穆邱君太行山下道士武帝時以道術受賞髮白再黑
齒落更出帝東巡泰山君廼冠章甫衣黃衣擁琴迎拜
道左止帝勿上上必傷足指及數里右足指果折帝諱
之故但爲穆邱君立祠

呂恭字文敬少好服食將一奴一婢於太行山中採藥忽

鳳臺縣志

卷之九

釋老

三

見三人在谷中問恭曰子好長生乎乃勤苦艱險如是
耶恭曰實好長生而不遇良方故採服此藥冀有微益
耳一人曰我姓呂字文起次一人曰我姓孫字文陽次
一人曰我姓王字文上皆太清太和府仙人也若能隨
我採藥語公不死之方恭卽拜曰得遇仙人若見採收
是更生之幸也卽隨仙人去二日乃授恭秘方一首因
遣恭去曰公來二日人間已二百年矣歸家但有數世
孫呂習作道士推求而得耳因以神方授習而去習已
八十服之卽還少壯至二百歲乃入山中子孫不復老

死

晉王烈入太行山聞雷聲山石忽破裂數百丈中一孔有石髓流出似青泥烈取食如飴餘半以與稽康皆凝而爲石又於石洞中見一卷素書視之不識也默識數字以語康康知之偕往輒不復見烈乃嘆曰叔夜趣非常而輒不遇命也烈後仙去

北齊曇始不知何許人神武起義奏請藏陰寺講涅槃經感野雉來聽藏神遺絹獼猴奉菓山神獻殮之異衣鉢傳惠遠

鳳臺縣志

卷之九

釋老

三三

隋慧遠澤之霍秀里李氏子甫生時曇始感夢至其家撫摩之心心心相印至六歲度爲弟子戒律精嚴契合真詮建寺於藏陰西注涅槃經成擲筆云若疏合禪理筆當駐空入隋文帝召至京參校經義卒於京邸文帝深悼惜之按府志以遠公分係齊周三朝又復辨爲晉之慧遠紛紛岐說今從唐大中寶歷太和三牌記詳加辨正知其另爲一人且相去四百餘年又太和碑慧一作惠其折服周武帝一事與周書北史不合別見集古錄唐慧觀頭陀隋大業中自終南山來身止一衲日惟一食

髮長不剪晦跡叢林遇無家下見山嶺幽寂古木泉
乃駐錫而嘆曰此古佛棲隱之所也因誅茅剡穢獲
礎知爲古靈巖舊基遂築室以居廣行濟度四方緇
雲集李衛公靖提兵過太行躬詣禮謁深嘉嘆之
普滿不知何許人太歷中遊澤潞狀若顛不拘戒行言事
無不驗嘗題潞州僧舍云泚水連涇水雙珠血滿川青
牛將赤虎還見太平年人初莫喻及朱泚亂人以意解
乃泚因涇州兵亂兄弟造逆乙丑丙寅寇平之兆也

慧峯汝州襄城人俗姓賀蘭氏法名慧峰出家峽石山之

鳳臺縣志

卷之九

釋老

三四

藏陰寺傳惠遠宗法苦志靜修戒律森嚴著語錄契合
佛旨於中和乙卯端坐而化乾寧間建塔有記

惠愔俗姓李唐之宗室棄家爲浮屠遍遊名山太和初自
并汾來少習莊易晚學天台見遠公遺跡喟然興嘆遂
闢草建宇以象假中通之教開剔聾瞶與司徒太常映
爲方外交結法華社數十人苾芻之流多依爲禪宗云
李漢王師姑黎城人幼貞靜慕清虛出家爲尼雲遊南北
晚於晉城砂城里愛其山水明秀誅茅創殿宇秉拂任
持三十餘載示寂得舍利七粒徒衆爲建浮圖

後周普龍廣順初自五臺山來彌勒石閣愛其泉石作終焉之計殿宇日拓度脫縑素多爲高僧後化去建塔寺側迨宋治平間賜額碧落

萃上人修真寶巖寺端居石室猛虎自伏後坐化遺骨甚香其徒建塔崇奉寺在太行山巔俗稱金燈寺是也

宋奉教慶歷時卓錫松嶺寺繕修堂宇四十間講大乘百王上生等經度僧俗千餘人齋僧二十萬置四大部經作兜率觀朝夕行之神語空中日師兜率觀成當捨幻質往生天宮乃於千峰山盤亭寺側誓焚肉身裹以布

鳳臺縣志

卷之九

釋老

三

蠟縱火焚之但見白氣冲天異香馥郁煙銷燼餘惟舌不壞若紅蓮葉徒衆建塔藏之

三寶幼有宿根大中祥符時出家寶山寺度僧俗千人大會四方講法華經妙解真諦至天聖四年七月兩手成文面色如金端坐圓寂異香經宿不散建塔立石記其事

慧覺俗姓金晉城人住持開元寺淨修有戒律聚名僧數十人爲說法雜徧巷俚語皆有禪機建隆元年安坐而化事具石龕記

金一張仙一名崇真澤州人一名道温京兆人同居州
上町社修真觀尋偕遊海島遇劉長生密傳法印復歸
結茆於此相繼坐蛻瘞同穴後數十年人猶有見者
寶寂出家青蓮寺能文工詩與僧洪源同以善琴名爲郡
守許安仁所知每稱其釋通儒理一瓶一鉢獨有這箇
在也嘗爲僧惠潮作塔銘文字古潔洪源亦高僧俗姓
陳談經冠一時修成化去

惠詮崞陽人出家五臺住錫琵琶寺造殿閣二十所度僧
衆千餘人寫真經六百七十九萬字大定時示寂衆爲

鳳臺縣志

卷之九

釋老

三

建立塔幢

元唐純素任曲河觀與張崇古皆清苦自持後先受二張
仙法印年各七十餘坐蛻刻劉長生白蓮花詩並王純
陽等爲五逸像於石

杜志元號通微子遭金末兵亂感夢出家爲道士詣天壇
受法於王純陽邱長生等妙入真悟元太宗二年歸里
捨宅爲觀李莊靖俊民記其事後不知所終

明法亮姓崔氏澤州人出家靈巖寺刻修戒行嘗行脚至
鍾山造藏經歸禁足三年晝夜檢誦不輟作石塔藏之

巖間書生上黨記太行山有等身熊者見諸生讀書巖間
及往覓則失其處人以為神仙

國朝月空俗姓黃湖廣人少出家參禪義受戒於京都愍
忠寺禮大慧法師通涅槃大旨所至輒興土木造瞿曇
諸像接引僧徒萬餘人多與賢士大夫遊嘗休夏太行
山值大旱禱雨徧然肢體一晝夜不飲食已而大雨霑
足募修西郭長堤捍水患造崗頭梵刹莊麗成巨觀一
日於普濟殿率緇白數百人設清醮忽觀音像從殿中
騰出象皆輟誦競觀俄而殿崩無一被傷者平日着布

鳳臺縣志

卷之九

釋老

三七

衲持佛頂陀羅尼經遠近病者傾誠拜禱或書神咒或
與破縷焚灰飲之立瘥後卓錫涿州至康熙四年自知
時當圓寂薙髮浴體索筆大書曰今日百十五年靈光
自來無染鐵牛躍過星羅撞破空中磨盤偈畢端然而
逝涿州為建浮圖郡西亦為立塔院陽城白孕謙記其
事載藝文